

Visoki predstavnik smijenio načelnika općine Mostar Jugozapad gospodina Ivana Mandića

Visoki predstavnik, Wolfgang Petritsch, je danas smijenio gospodina Ivana Mandića sa funkcije načelnika općine Mostar Jugozapad i zabranio mu obavljanje svake zvanične, izborne javne funkcije ili funkcije na koju je imenovan, te kandidiranje na izborima ili za funkciju u okviru političkih stranaka.

Glavni razlog za smijenjivanje gospodina Mandića je njegovo kontinuirano opstruiranje imovinskih zakona zbog čega je stopa implementacije imovinskih zakona u općini Jugozapad daleko ispod opće stope implementacije imovinskih zakona u Federaciji Bosne i Hercegovine.

Gospodin Mandić je, između ostalog, bio nadležan i za rad općinskog Odjela za stambene poslove u općini Jugozapad. U ovom svojstvu, on je odgađao rješavanje slučajeva koji se odnose na imovinske zakone, pri čemu nije osigurao da zakoniti vlasnici uđu u posjed imovine, koju su, na primjer, nezakonito koristili HDZ i UDVDR.

U toku novembra 2001. godine u općini Mostar Jugozapad odgođene su 43 deložacije. Ambasador Colin Munro, bivši zamjenik Visokog predstavnika i šef Ureda OHR-a Jug, je 3. decembra 2001. godine u pismenoj formi obavijestio gospodina Mandića da se odgođene deložacije moraju ponovo zakazati i izvršiti do 31. decembra 2001. godine. Do ovog roka izvršeno je manje od jedne trećine ovih deložacija. Gospodin Mandić je takođe javno stao u odbranu slučajeva dvostrukih korisnika stambenih jedinica i izjavio da bi izbjeglice iz trećih zemalja trebale biti zadnja kategorija stanovništva koja će ući u posjed svoje imovine.

Ignorirajući Odluke Visokog predstavnika od 27. aprila 2000. godine i 30. marta 2001. godine o dodjeli zemljišta u društvenoj svojini, gospodin Mandić takođe nije osigurao dostavljanje zahtjeva za izuzeće od odluka o dodjeli zemljišta u državnom vlasništvu, uključujući i društvenu svojinu, Uredu Visokog predstavnika. Izuzeće takođe nikada nije zatraženo u slučajevima nezakonite nadogradnje spratova na krovovima postojećih stambenih zgrada u općini Mostar Jugozapad. Ovo predstavlja dodatnu ilustraciju nepoštivanja vladavine prava od strane gospodina Mandića.

Imajući na umu da Aneks 7 predstavlja suštinu Daytonskog mirovnog sporazuma i uzimajući u obzir najnovije izmjene imovinskih zakona putem kojih je Visoki predstavnik još jednom naglasio svoje opredjeljenje da omogući povratak, sasvim je jasno da je ponašanje gospodina Mandića neprihvatljivo. U svom pismu o smjenjivanju sa funkcije koje je upućeno gospodinu Mandiću, Visoki predstavnik je naglasio da je njegovo ponašanje "ozbiljno ugrozilo provedbu Općeg okvirnog sporazuma za mir u Bosni i Hercegovini, a posebno njegovog Aneksa 7".

Konačno, obavljajući dužnosti kantonalnog ministra unutarnjih poslova, gospodin Mandić je donio nezakonita upustva za rad policije u općini Stolac, čiji je jasan cilj bio spriječavanje rekonstrukcije Careve džamije.

Uprkos apelima koje je ambasador Colin Munro nekoliko puta ponovio, gospodin Mandić se ponašao na način koji je policiju dovodio u tešku situaciju i općenito povećavao tenzije, što dodatno diskvalificira gospodina Mandića sa javne funkcije.